

**Nunatsinni innuttaasut rubiinik namminneq atugassaminnik, pinneraasiassaminnik aammalu pinneraasiareriartut nunatsinni nunanilu allani tuniniarsinnaasaminnik katersisinnaatitaanissaat pillugu apeqquteqaat aallaavigalugu oqallittoqarnissaanik siunnersuut.**

(Inatsisartunut ilaasortat Siverth K. Heilmann aamma Knud Kristiansen, Atassut)

**Akissuteqaat**

(Inuussutissarsiornermut Aatsitassanullu Naalakkersuisoq)

Aallarniutigalugu apeqquteqaat aallaavigalugu oqallinnissamik siunnersuummik saqqummiussinermit qujarusuppunga.

Aatsitassat pillugit ingerlatallu tamatumunnga pingaarutillit pillugit Inatsisartut inatsisaata nr. 7-ip 7. december 2009-imeersup (aatsitassanut ikummatissanullu inatsit) atuutilernerani, inatsimmi annikitsumik aatsitassarsiorluni misissuinissaq piiaanissarlu pillugit maleruagassanik immikkut ittunik atuutsitsilernikkut periarfissiisoqarpoq. Tamatuma ullumikkut annikitsumik aatsitassarsiornissamut akuersissutinik arlalinnik tunniussisoqarsimanera ajornarunnaarsippaa.

Maleruagassat ullumikkut atuuttut malillugit aatsitassanik inuussutissarsiutigalugu katersineq aamma inuussutissarsiutigalugu katersineq immikkoortinneqarput. Inuussutissarsiutigalugu katersineq – tuniniaanissaq siunertaralugu katersinissamik piiaanissamillu siunnerfeqartoq – annikitsumik aatsitassarsiornissamik akuersissummik peqarnissamik piumasqaateqarfiuvoq. Inuussutissarsiutigalugu katersineq – tuniniaanissaq siunertarinagu nammineq atugassanut tungassuteqartoq – sioqqutsisumik akuersissummik peqarani ingerlanneqarsinnaavoq.

Taamaattumik maleruagassat ullumikkut atuuttut malillugit rubiinik katersinissamut, tamanna nammineq atugassanik pissappat, killilersuisoqanngilaq. Paarlattuanik katersineq pinneraasiannik allanillu kusanartulianik najukkami avammulluunniit tuniniagassanik sanaartornissaq siunertaralugu pissappat, tassani nassuiaassut malillugu nammineq atugassanik tamatuma pinissaa pineqarunnaarsimasussaavoq.

100.000 koruunit annerpaamik aningaasartaliunneqarnissaannut siunnersuuteqartut siunnersuummut tungavilersuutaanni taaneqartunut tungatillugu erseqqissarusuppara, killissaliussaq taanna aatsitassanut ikummatissanullu inatsimmi maleruagassanut ullumikkut ilaangimmat. 2009-imi ukiaaneranani ataatsimiinnermi aatsitassanut ikummatissanullu inatsisip Inatsisartuni suliarineqarneranut atatillugu annerpaamik aningaasartaliussassat taakkua peerneqarput.

Kisiannili tamanna isumaqanngilaq innuttaasut rubiinik niuerutigalugu piiaanissamut periarfissaqarsimanngitsut. Kisiannili tamanna annikitsumik aatsitassarsiornissamik akuersissummik peqarnissamik piumasqaateqarfigineqarpoq.

Siunnersuuteqartut tikkuarpaat, innuttaasut nunaqavissut allat misigisassarsiornernannut isiginnaartuinnaassanngitsut, kisiannili inuit allat aatsitassarsiornermik misilittagaqartut suleqatiginissaannut periarfissinneqassasut. Tamatumunnga isumaqataasorujussuuvunga,

oqaatigisinnaavaralu inuiaqatigiit aningaasaqarnerannut tunngatillugu nalunaarusiat ingerlatseqatigiiffiit siunissami aatsitassarsiorfinnik suliassanut atatillugu suliarisassaat, innuttaasut nunaqavissut sapinngisamik annertunerpaamik peqataatinnissaannik tamarmik siunertaqartussaammata.

Tamatumunnga nangissutigalugu ingerlatseqatigiiffiit, kommuunit aamma Namminersorlutik Oqartussat akornanni suleqatigiit pingasut isumaqatigiissutaat suliarineqartussaavoq, tassanilu aamma suliassani nunaqavissunik peqataatitsinissap qulakkeerpeqarnissaa kiisalu sulisussanik piginnaangorsaannissamut, ilinniartunut sulilluni sungiusarfissanut, ilinniartitaanermut assigisaannullu inuiaqatigiinnut tunngassuteqartunik suliniutinut aalajangersimasumik siunnerfilersuinissaq siunertaavoq. Suleqatigiit pingasut isumaqatigiissutaanni ilanngunneqartussat Naalackersuisut kissaatigisaannut ilaavoq, nunaqavissut kusanartuliortartut aatsitassarsiorfiutiqatigiiffimmit toqqaannartumik rubiinik pisisinnaanissamut periarfissaqarnissaat.

Ukioq manna siusinnerusukkut upernaakkut ataatsimiinnermi apeqquteqaat aallaavigalugu oqallinnissamik siunnersuummut atatillugu oqaatigisattut, aatsitassarsiornermi inuussutissarsiorlut minnerusut najukkami aallaaveqartut ineriartortitsivigineqarnerat annertunerusumik tapersorsorniarlugu, annikitsumik aatsitassarsiorinnissamut suliassaqarfimmi maleruagassat maannakkut atuuttut pisariillisarneqarnissaat pisariaqartinneqarpoq.

Taamaattumik suliassaqarfimmi Naalackersuisutut akisussaasuusutut, annikitsumik aatsitassarsiornermut maleruagassat atuuttut misissorneqarnissaat 2011-ip naalernerani sulissutigaa. Tamanna qinnuteqartunut nuannaarutaasumik, annikitsumik aatsitassarsiorinnissamut akuersissutinut qinnuteqartarnermut aammalu ingerlatanik suliaqartarnermut suleriaatsit pisariillisarneqarnissaat, taamaalillunilu pisortat allaffissornikkut aqutsinerisa eqaannerusumik ingerlasinnaanissaa siunertarlugu ingerlanneqarpoq. Allanguutaasussatut siunnersuutaasut ilagaat akuersissummik peqarani aatsitassanik ukiumut 100.000 koruunit angullugit nalilinnik niuerutigalugu paaanissamut inuinnaat periarfissaqalissasut.

Taamatut oqaaseqarlunga oqallilluarnissamik kissaappassi.